

高雄小故事

十八羅漢山的故事

撰文／吳佩蓁



美濃往六龜方向，佇省道臺 27 甲線，會當看著路邊有「十八羅漢山服務區」八个白色大字的 *khang-páng*¹，真影目、風景真嬌。遮有各種的農產品恰在地的伴手禮，若腹肚枵欲食點心，嘛有咧賣茶滷卵、烘煙腸、涼的飲料、咖啡等，想欲放鬆心情欣賞六龜的風景會使坐佇涼亭仔、石頭仔、休息座椅抑是行一逝景觀橋順繼看火成岩「九龍寶石」，攏是真好的選擇。

「十八羅漢山」民間有一个傳說的故事，古早河裡有六隻石龜不時就興風作浪，予往來的竹排仔反船，擾亂居民生活害 in 欲過河驚心懍命。有一段時間，遮的石龜為著歇睏煞 *peh*² 上岸分別覘佇五个磅空內，毋過第六隻石龜煞無磅空通歇睏，不時就咧攪擾，予居民心驚驚。為著欲壓制第六隻龜，百姓就祈求觀音菩薩鬥相助，可能是感動上天，菩薩差十八羅漢來遮鎮壓，閣指示居民挖第六个磅空，將第六隻石龜安置內底，這時陣百姓的生活才平靜落來，後來就將這個所在的山脈號名叫做「十八羅漢山」。

遮有真豐富的森林資源，可惜早期六龜對外交通封閉，欲運送物件誠無方便，後來日本人來了後，看到遮的樟仔樹真濟誠有經濟價值，尾仔佇昭和年間（1927 年）開公路的時，佇十八羅漢山挖五个磅空，用來運送樟仔，後來無夠用閣佇 1943 年加挖第六个磅空。

一直到 1990 年開外環道了後，這六个磅空煞無做運送的道路，毋閣到今猶保存了真完整，遮的山脈有特殊景觀，是真有價值的自然文化資產，林務局佇 1992 年就將這個所

1 *khang-páng*：看板。

2 *peh*：爬，攀登。

在設做「十八羅漢山自然保護區」。

遮孕育真濟豐富的生態恰野生動物，親像夜婆、燕仔、尾蝶、昆蟲；植物林內底會當發現有「錢票樹」之稱的鹿仔樹、水鹿愛吃的山黃麻、油點草、刺竹、破布子、月桃、山鹽青，閣有恰客家生活文化密切相關的大冇樹、埔薑茶，來遮蕅一輾你會感覺大自然真奧妙四界攏是寶予咱開眼界增加知識。

想欲熟似當地的歷史起源，對體驗十八羅漢山生態之旅有興趣，欲入去自然保護區內底，要佇 5 工前去「林務局自然保育網」線上申請就會使，閣會使預約解說員，若有專人導覽解說會較清楚閣會當親目見證六龜珍貴的自然資產。

本文榮獲「2022 年高雄小故事」第三級佳作



高雄市立歷史博物館
KAOHSIUNG MUSEUM OF HISTORY

參考書目／

1. 茂林國家風景區，網址：<https://www.maolin-nsa.gov.tw/04000076.html>。
2. 林務局自然保護區申請進入系統，網址：<https://reurl.cc/kZDAn>。